

四庫全書

集部

欽定四庫全書

集部

新安文獻志卷九十五下

詳校官中書臣孫衡

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣梁鳴岐

欽定四庫全書

新安文獻志卷九十五上

明程敏政撰

行實

文苑

江東撫幹通直郎致仕汪公

儀鳳

墓誌銘

方回

歛汪氏自越國公以六州歸唐其後始大入宋雖仕隱
相半而厚與薄取以德自植者久愈益大公諱儀鳳字
翔甫其先自績溪徙今為徽州歙縣人徙之十二世為

公曾祖崇實鄉稱為長者夫婦俱年八十五祖擇善父
鵬舉承務郎資沉毅誠恪以儉勤審取與愈益大其家
者也年八十二母鮑氏封孺人年八十五歷世植德並
詳見公所為壙記蓋公祖禰三世而四人皆年近九十
公之卒亦八十四公六歲工文師靜菴吳公自牧治易
公趨嚮既正而承務公察公兄弟三人皆偉器又為延
師得丞相訥齋程公元鳳改治詩訥齋居塾九年為南
省第二人躋顯仕公與二弟治鳳鳴鳳不更他師蓋深

得其學云吾州詩大比舊不與選回先君師四明舒公
璘禮部符許拔解自先君慶元乙卯始先君入上庠登
第而左史竹坡呂公午與訥齋相後先然鄉額僅拘於
一端平改元甲午公俯就鬻爵以詩中江東漕薦嘉熙
丁酉又為漕試第一時四明安公劉有聲上庠以同經
先內交永嘉陳公淳祖二曹公元發良朋同社結課誓
將同登而戊戌榜公獨退舍竹坡時為監察御史因客
留公於科舉外講義理學蓋訥齋發其先而竹坡成其

終公於是所聞粹矣所居旁近靈山之下有寺焉歸而為李公擇山房讀書之計意將終老郡守貳魏公克愚龔公應之章公公權訪公山中佐築樓藏書費山房成訥齋為題其扁又為亭泉上曰山泉而世因稱公為山泉先生公雖身遯巖谷名震京師江東漕使趙公與弼合諸臺以遺逸剡聞謂當處以孫明復陳無已魏元履官而僅與免解公雅不欲逐舉子迫於二親出山又二年淮閭申前奏旨賜文學出身免銓叅注訥齋適當國

喜且疑以為嫌參政丁大全欲擠訥齋去而攘其位則
偽力贊決而陰嗾張鎮繳論其意實不在公也公寶祐
戊午景定辛酉又連與浙漕薦凡五上春官會有奏辨
大全鎮誣讎者王音賜可授迪功郎隆興府司戶叅軍
改辟壽春府下蔡縣主簿權淮西制司準備差遣秩滿
差充淮東安撫司幹辦公事滁城上功以儒林郎循承
直郎陞淮東制置司幹辦公事連丁內外艱服闋添差
江東安撫司護視訥齋墓事候任滿與陞擢差遣公終

不自陳丞相信菴趙公葵而下舉改官狀五及格咸淳甲戌詣部班引廟堂議處以史館公謝不願改通直郎致其事緋衣銀魚居里終身嘗自稱老山居士若老於山不出云者丙子五月兵變盜起屠戮慘甚公之族斃於寇者十一人公言有司罪人皆得庚寅三月盜又起潛口焚四都巨室數十家羣黠於公前後獨不敢犯如黃中迎拜鄭康成者則可知公之為人矣回少公二十歲洎休官嘗同友人曹涇清父以癸未訪公里第登西

與之樓對靈山吟嘯竟日不鄙辱賜和篇時公年七十有七又七年乃哭公其生開禧三年丁卯正月十六日卒以至元二十七年庚寅八月十日狀公行者吾清父也言皆可信回聞朱子曰三代以上氣數醇醲聖賢皆壽以下反是由是推之周室東遷以入春秋壽者鮮矣然其間有能審於取與之際薄取而厚與者亦必天之所甚佑而有不容不壽者焉其不壽非必皆疾癘短折之氣為之也劉子政紀弒亡之禍有數而經書殺其大

夫者至不可勝數盈與謙之異也魯季孫行父季友子也僖十六年季友卒文六年行父用事始見於經文宣成皆十八年至襄五年行父卒去季友七十六年行父當近百歲其所以壽妾不帛馬不粟也鄭子產七穆之一子國子也襄八年鄭侵蔡始見於傳昭二十年卒行事可考者四十四年歷事簡公定公聲公獻公亡慮八九十歲其所以壽孔子稱之曰古之遺愛行己恭養民惠也齊晏平仲之父桓子襄十七年卒平仲以知禮見

於傳史記魯定公十年平仲卒言議可見者五十餘年
亦當八九十歲其所以壽一狐裘三十年又納邑辭
富也吳季札吳王壽夢少子兄諸樊欲立之季札讓
國年可十五六哀十一年楚子期伐陳季札救陳退
兵以為子期名杜氏注襄十二年至今七十七年季札
蓋九十餘其所以壽蓋以國與人大矣又能以名與人
至於以劍挂人之墓則又無一物能累其心也嗚呼此
四名卿者於春秋衰世諸人不得其壽之時獨能以壽

永終則豈非薄取厚與之德有以勝之歟惟今山泉之德亦然科第可取也不可必取則已之官爵可取也或畀之或奪之游幕府通閭籍筋力未也可懸車則去之貨財可取也同氣析居田園瘠羸室廬弊卑葩物圯歟我願受之入相出藩我資我師代匱翰墨言不及私乃若名高當世尤士所願鈎取者也公識淵學詣幽討古汲旁行敷落急就凡將鼓籥鼎刻奇字庾辭聳牙格磔探玄入微儷語宗真西山韻語尚劉潛夫散語慕江子

遠妙年初務崛奇至晚節泯圭角削險就夷視後生奮
觔距躡聲價恂恂退默若罔聞知混迹於社叟里老泥
飲巷歌之間能以名讓人不取則尤近世人物所希有
也其於族黨鄉鄰昇平而變故歡娛而患難孤姪與師
授幼女與姻對出粟與下價市物與高估濶吾與梁塗
吾與甃疾與藥瑾與楷寒與絮飢與飫索游與資裝家
世素必厚所與而公於時之既異愈加厚無求不與也
嗇於勢利而豐於慈惠輕於物欲而重於友弟不足於

榮耀侈靡而有餘於恬澹潔清行可以交神明則功足以奪造化也公素不飲酒善飯寡疾將卒之前一月稍力弱食減家人異之公自謂無所苦却藥餌與醫者語必正冠焚香漸不粒食者旬餘忽一日令具湯沐盛服索紙書數十字乃口授孫濬紀載千二百四十三言而於末自書曰全而歸之原始反終乙夜熱氣上出如炊掖坐間小咳咽而逝其不怛化如此平生著述充屋僅存山泉類橐四十二卷程文六卷傳世娶宋氏先公三

十年卒子男女各一人東陽郡庠生早卒前太學內舍
發解進士方闕飛其壻也孫男一人即濬業儒好修曾
孫男二人源清源深承務公存日祖墓生雙竹識者謂
文字之祥題詠盈度公治命屢進二曾孫親為說書雙
竹之應其在斯乎山房書兵後失亡公重貲贖求復如
故親校讎遺後人濬將以明年辛卯十一月四日奉公
柩葬于永豐鄉後村之原回先君鄉舉舍選遺文賴公
襲藏至今且早相賞拔銘敢辭銘曰

約以納博以施壽斯宜善則祥謙則福理若茲歛之原
全厥歸觀刻辭

廬州梁縣尉事天先生江公

潤身

墓誌銘

曹涇

故廬州梁縣尉事天先生江公既葬之明年其子心宇
以前進士山屋許公月卿乙酉歲所為行狀視曹涇使
為誌銘涇望輕筆力弱慊弗敢任然知敬愛公舊矣憶
春水鱗鬣之後先悼人世萍蓬之閃倏死生亦大胡得

無言矧嘗涉筆存耕公之葬其可辭乎存耕公諱師夔
公考也自存耕公上遡蕭公十三世居徙官歷名諱已
見存耕公銘內公諱潤身字明德徽婺源人生而俊穎
異常兒髫鬣時歲旦上元族里歌呼羣飲長少畢出獨
凝坐一室晝夜讀存耕公大奇之於書一覽即解暗誦
不誤缺一字於文操筆立成据經引傳切中肯綮而繩
墨具焉景定甲子以流寓領浙漕舉登乙丑第授廬州
梁縣尉明年攝本職兼簿事自兵興淮為次邊郡曹邑

僚半出鷄弁或起卒伍豪民賈豎至以賄權公泣以公
廉不為怯恆首黜掌戶胥數人無譚者上司若郡委送
駢來迎又輒解訟者至乞從公求直居數月平反大獄
者三衆以為神於是方議迎母携家忽報制司辟某人
直替即以詩辭制置應山李公庭芝應山舊知公愕焉
留攝寶應主簿旋奏充瓜洲鎮官曰吾知子貧又廉姑
用資以完庫母見薄也朝旨猶以及期而辟非格却之
再奏命下而公卒矣嗚呼俗吏文法淹天下士如此公

貌古而岸峭直軒豁幅巾縫掖辭辨風生少或為矯世之行喜面折人當山屋公初第時嘗戲取其綠袍服之已又曰是何足云孔明景略吾事耳晚乃不然恂恂怡怡如也居母夫人洪氏喪哀毀過制喪父一遵遺令以文公家禮從事事繼母龍氏盡禮遇二季巖困愛而教之不有私財嘗大書於屋壁曰天下無不是底父母家人離必起於婦人於姻族不肯隨俗炎涼好獎後進謀人必忠未第前嘗伏闕上書諫三事其治兵條極言三

衙諸閭廂禁營寨諸項利病欲以兩淮曠土內地荒田
給游民貸其資糧籍為民兵然後以諸寨移之松江諸
屯移之極邊以襄閩經理京襄以湖閩進守利路皆指
切精的詩文少慕靚麗奇辭逸語衝齒頰出不休晚羞
其為一主以理壯歲師陸子靜門人不嫌已而師北山
何公基實勉齋黃文肅公高弟而勉齋晦菴嫡傳也造
詣益粹戊辰春自廬書示心宇曰吾十歲見朱子祭張
敬夫文心慕之癸巳得近思錄丙申得周程諸書旁求

於張呂陸氏近始自信蔡氏程氏自太極圖而下之勉齋自四書而上之蔡謂四書梯階六經近思錄梯階四書勉齋不謂然吾今專守勉齋學又云佛氏勸人爲善本不大畔於儒至謂燃香誦經飯僧一會即滌陰惡實無此理祇足長惡如胥吏輩爲欺爲虐何所不至每奉佛以自解既恃有此稔惡益甚屠兒劊卒操刀欲割必誦佛號亦此類也吾州佛寺半是黃巢時所建吾邑四月八日飯僧大會其重施者多出於椎埋之徒茲豈非

佛氏實長其惡乎公之學問精博議論勁正大略如此
既第銳志及物改號民齋然事天云者自少及壯學者
習知如誦王彥方司馬君實然既卒門人三山林茂春
應山祝樸相與言曰必存養事天先生志也用之不究
則亦曰天是所謂事天以終身者乎因以為私謚公以
已巳十月十六日卒于寶應心宇號跣奉樞浮淮絕江
藁葬于無錫之湖埭實依從子一新寓居則庚午之五
月二十一日也其返于鄉以甲午九月六日其合葬于

夫人馬氏之兆以乙未十二月二十一日隸丹陽鄉瑞
亭里吳村之官牌塢抱亥挹丙卜者曰祥夫人之葬在
丁亥二月二十八日其卒庚午十二月八日也心宇於
是大事終而形神亦瘁矣公生以嘉定丁丑十月得年
五十三公惟一子心宇孫男二人賓王佐王女秉禮曾
孫遵善狀謂心宇能世其學所著深衣說有據以予觀
於心宇君博洽不減前人而深潛密栗以為性行紆餘
峻潔以為文詞則豈惟鄉之同輩少比而已賓王兄弟

皆秀文不凡又將酷類其父江氏世世有人如此亦何必公慙卿卿慙長以倘來之物易無窮之譏哉况所謂勗躬肅後而委祉者又有在也銘曰

以為不遇邪則既第也以為已仕邪則屢千百儲之而試者才一二也夫孰匪中枵而外肆此獨來之遲失之遽也將天所以命我所以事貴其不貳而流與坎姑置也抑饑而豐天亦至公既嗇其躬後當顯融嵬嵬官牌噫玉斯埋庭則有槐其大而家

方總管回傳

洪焱祖

方總管回字萬里歙縣人父琢以太學上舍登第仕至承直郎廣西經幹權融州通判坐廣西提刑錢弘祖挾私憾誣劾謫死封州回幼孤從叔父球學穎悟過人讀書一目數行下少長倜儻不羈賦詩為文天才傑出鄉先達呂左史方吏部咸亟稱之郡守魏公克愚一見其詩即延置郡齋移知永嘉亦拉以自隨制帥呂公文德尤相厚善景定三年以別院省元登第調隨州教授呂

公師夔提舉江東辟克幹辦公事歷江淮都大司幹官
沿江制幹所至皆得幕府譽獨與賈似道不偶嘗一再
除國子正太學博士輒遭誣劾登第後踰紀始改官通
判安吉州都堂稟議時則德祐元年矣似道魯港喪師
之後猶在揚州衆皆懼其復入莫敢論列回獨首上書
數其罪有十可斬中外快之俄除太常寺簿又上言賈
似道與其客廖瑩中皆當即誅王爚不可為平章陳合
不可為同僉當去福王入輔之議當寢出知建德府方

用兵之際興建學宮以雅量鎮浮俗煦弱鋤強賞罰必
信鄰郡草寇乘間竊發獨境內肅然至元丙子春奉宋
太后及嗣君詔書舉城內附改授嘉議大夫建德路總
管兼府尹已卯入覲遷通議大夫依舊任在郡七年無
絲髮為利意至賣寓屋猶不足以償逋代歸不復仕倘
徉錢塘湖山間二十餘年豁達輕財喜接引後進嗜學
至老不厭經史百氏靡不研究而議論平實一宗朱文
公有壁流集桐江集若干卷行於世又有讀易釋疑易

中正考皇極經世考古今考厯象攷衣裳攷玉攷先覺
年譜瀛奎律髓名僧詩話合若干卷藏於家卒年八十

一子存心蔭授義烏尹

先君遺體惟回一影自先嫡妣卒戊子己丑二年書家事後事

以託諸弟者盈四冊惟恐回之不能歸也又慮其歸而不能長也又慮其長而不能成也然則先君之意哀矣痛矣逮回四歲得歸賴先七叔父養回以至于長先八叔父教回以至于成回不專為科舉之學學性理自真西山讀書記入學典故自呂東萊大事記入學五言自張宛丘入學四六自周益公入而時文之進自州教授天台諸葛公泰始年二十二見知於左史呂公午年二十四見知於丞相程公元鳳年二十五見知於端明洪公勲叅政饒公虎臣詩人亦山鄭公會年二十六見知於郡守卿魏公克愚郡倅應公彌正郡糾常博張公汝諧

年二十九見知於秋崖方公岳踰三十觀文趙公與憲
提舉金公文剛江閩馬公光祖制使呂公文德尚書呂
公師夔禮侍劉公震孫相次見知年三十五中兩浙漕
舉登仕郎誥呂公師夔所與而魏公克愚解送年三十
六僥倖別院省試第一人丞相馬公廷鸞賞其義丞相
章公鑑賞其策廷試丞相文公天祥制帥趙公日起恭
政常公挺為考官置回首選不遂猶與第一甲歷官隨
州教授江東提司準遣國子監書庫官江東提舉司幹
辦公事國子正江准都大司幹辦公事再國子正太學
博士再沿江制幹改官通判平江府改通判常州改淮
西帥機監華州西岳廟通判安吉州都堂稟議太常寺
簿除監察御史丞相王淪格之兼莊文府教授知建德
府節制往來駐戍軍馬除秘書郎加直秘閣依舊任都
督府叅議官於是年四十有九矣小狀舉主三人運使
聶公棠提刑鮮于公應文制帥呂公文德京狀舉主五
人呂公師夔馬公光祖制帥朱公祺孫禮侍翁公合制

欽定四庫全書

卷九十五上

帥黃公萬石特薦舉主一人工侍郎公元岳為回買宅
特相知深者郡守府卿宇文公十朋餘詩友文人及直
諒多聞之交滿天下不勝書雖然回何以得此於一時
哉皆先君之餘澤為之也二三叔父之教養為之也回
早遊江湖不及娶納杭人姚氏併它婢生七男四女七
男存心正心高心明心餘三人庾孫鶴孫雷孫早夭四女
未婚潮娘餘二人孿生不舉存心娶林氏史館檢閱添
差通判建德府士愷之女生女桐娘未婚嫁貴池縣丞
程桂鳴呼回之所以名實先君名之自初生即名曰回
哥以寓他日還鄉之義長而不敢更他名左史呂公午
先君之友一見謂回貌肖先君字之曰萬里以其歸自
遠嶠而又將期之以遠到云者然自收科立朝內獨與
賈似道不遇四取彈舉之者不勝毀之者多將求無
負竹坡先生之所以望以永慰先君於地下亦曰強為
善而已矣回泣血謹書先是德祐乙亥治郡退用陳
后山先君事狀體著為回先君事狀刊寫已定明年丙

子春二月六日奉太皇嗣君詔書以郡歸附是為至元十三年始行在所宰執大臣以嗣君名具表納土送璽子臯亭山在正月十八日軍馬入臨安府易守在二十日回猶堅守孤城半月餘王郎中世英蕭郎中郁提兵五千賚詔至郡官吏軍民一口同辭恐有如常州之難者回按蜀志景耀六年蜀并于魏霍弋時以安南將軍統南郡事聞成都守大臨三日諸將咸勸速降弋曰今道路隔塞未詳主之安危大故去就不可必也得後主東遷之間始率六郡將上表歸魏羅憲時以已東領軍守永安城開成都敗城中擾動江邊長吏皆棄城走憲斬稱成都亂者一人百姓乃定得後主委質問至乃帥所統臨于都亭三日吳聞蜀敗圍攻六日晉王遣荊州刺史朝烈救憲憲歸魏史臣謂霍弋羅憲保全一方雖非人臣之正義然國亡主遷土地人民無所歸為小郡者力不能全國矣全其部民可也建德府大邑戶十二萬有奇口四十萬許全十二萬戶四十萬戶亦可也彼

列閭連城先下臨安未下之先者可罪也而譁士或以不死責回籌帷鉅公分鉞櫨帥不責之死於未亡國之先而以責一內郡太守於國已亡之後乎殷有三仁亦異乎孔子之論人矣今謹附書于先君事狀之後伺稍定諸子名數藏之家屈伸出處易有時義付諸後世之公論足矣要之回假守七年無絲髮為利意徽州李世達之變家藏書數萬卷一空他物稱是在郡倒囊竭廩至賣寓屋猶不足償逋而一子在燕旅食不繼此豈有所貪而然哉持是以見先君於地下亦當有辭矣壬午正月回泣血再書

元中順大夫同知徽州路總管府事致仕贈中

憲大夫上騎都尉追封新安郡伯程公

龍

家傳

程 樞

公諱龍字舜俞初名淵性明好學初從伯祖就學漢東
滕氏滕故曾祖母家也其先淡齋先生文公畏友弱冠
館于德興程村道西坑口董氏又故祖母家也其先叔
重先生亦文公門人故公所學最有源委館東程國諭
家嘗夢門右石鼓有龍蟠其上夢覺令家人開門視之
公方造門以門尚閉因假寐石鼓上國諭大驚出迎知
公不凡館遇加厚而不言居二年秋闈將近國諭始畧
言之且請改名龍遂登咸淳七年進士第公先議昏胡

氏報榜後胡氏忽戒媒者來辭曰君已榮貴顧家世甚寒願聽別議公不許卒娶之識者知其遠大矣授黃州黃陂縣主簿就任除安慶府教授值有遷城版築之勞調池陽司戶叅軍隨除嚴州推官與虛谷先生方回同官二年北軍下臨安太后手詔諭州軍降方遂以嚴郡入附公不肯署被擒巴延丞相以文學士釋之辟差同知江西贛州路總管府事勒令之任中道走歸隱居養母匿影藏形者十餘年會拘刷宋故官不奉詔者族其

家威令峻切時太夫人尚無恙逮者及門公垂涕曰安
有為人子而愛身棄母者哉因出受命授温州永嘉縣
尹奉母之官九年除松江府判官又以承事郎除興化
路總管府判官隨以奉訓大夫宣授奉化知州三年以
奉直大夫除潭州路同知湘陰州事五年來歸歸舟所
載惟所著三分易圖板數十擔而已年逾七十告老于
朝以中順大夫徽州路同知總管府事致仕給半俸終
身贈考君京六府君中順大夫信州路同知總管府事

妣汪氏贈新安郡君夫人胡氏封新安郡君孫燧蔭授
將仕佐郎杭州新城縣主簿時延祐五年戊午冬也公
居官五十餘年善政甚多惜不得熟聞而詳述之其為
學以尚書義成名後所著述有尚書毛詩二傳釋疑禮
記春秋辨證及弄環餘說三分易圖在湖南時省院以
圖鈐梓板留鶴嵩莊經壬辰劫火莊池有亭曰得寓學
士大夫多為記序歌詠名得寓亭集公所作詩文名歸
田錄又會宗譜遠而河南江西湖湘近而休歛饒信開

化金華博采文籍考索備至名龍陂程氏世譜譜與歸
田錄樞執事編寫今經世變片紙無復存者可勝嘆哉
公號荀軒又號不不翁讀書之室曰不不堂所居之屋
曰致政堂生於宋淳祐壬寅五月二十七日卒於至治
壬戌閏五月六日壽八十有一贈中憲大夫上騎都尉
追封新安郡伯先是河南有談祿命者謂公壽有九九
加五之數至是果驗加五閏五月也郡君胡氏壽九十
卒於至元四年戊寅正月無子有女二人側室陳氏一

欽定四庫全書

新安文獻志
卷九十五上

十六

子曰楠早卒無子以從兄林次子燧入繼仕止太平路
推官公貌高古而長身其性情溫和不寬厚言不輕發居
官愛民在鄉睦族與湖南憲使程雪樓友善後雖相去
遼遠書札往來相問勞不絕書所言亦多保民睦族之
道歸田後退居鶴嵩莊以樞可教因留侍焉晝則代應
賓客暮則授受講貫凡三年時樞年十六七學未有成
公貽書鄉丈人雪砭先生江公曰吾家續一脉之文者
惟此子而已今戒其請見敢求開發或尋一小館俾為

童子師庶得收斂其心雖欲不學不可得矣延祐庚申
始假館中平葉氏得執經問道於先生前今能稍知詩
書及文字者皆先生之賜也然則我伯父愛獎之德其
又可忘邪天蒼蒼而地茫茫伯父之儀型不可復見矣
嗚呼悲哉誠懼後人不知先德始末故述其大畧以詔
之如右延祐五年歲在戊午秋八月望日從子樞百拜
謹書

曹主簿

涇傳

洪焱祖

欽定四庫全書

新安文獻志
卷九十五上

十九

曹主簿涇字清甫屯田郎中矩之裔曾祖然始居歙南
葉村涇幼穎悟八歲能通誦五經不專攻舉子業研窮
經學尤精詣於朱氏之書故為文率皆典古有法寶祐
丁巳年二十五歲江東漕解第二歲淳戊辰殿試丙科
授迪功郎昌化縣主簿曹氏自屯田至涇正奏凡六人
辛未丞相馬廷鸞以書幣聘主教席廷鸞諸子端臨最
博學知名撰文獻通考其學實出自涇壬申奉勅充廣
西廊階祠官禮成父鎬以高年得封承務郎癸酉充信

州考試官甲戌赴昌化簿任尋轉修職郎乙亥權知縣
事不久奉親還里元至元丁丑建德路請教儒學戊寅
江東按察請充紫陽書院山長招致生徒創闢學宮壬
午辭歸養自是不復出州里循理篤行士林宗之與方
回齊名延祐乙卯卒年八十二號弘齋所著有講義四
卷書文韻儷藁各五卷餘如服膺錄讀書記雜作管見
泣血錄曹氏家錄甚多次子仲堃能文著書先涇二年
卒有詩文講義二卷通鑑日纂二十四卷長孫次炎曾

孫宗屋皆能承其學

馬碧梧送曹清甫序休寧曹清甫壯年擢高科遲遠次抱邁往不屑

之韻予心敬焉於是館榘於我再寒暑矣予輔政中朝清甫不肯為薛宣之吏予謝病幽谷清甫不肯為程公之賓予觀世之塗附者不然其趨也翕然為蠅蚋其去也倏焉為風雨獨予備位中書心門俱水特無二者之患焉清甫助我多矣清甫筆底殊有陽秋前此衡文秋浦士之蘄然露頭角者率歸鑑哉今茲又詔求士方將治任東州清甫往來予無以贈惟有得進士為將相以應今世之需予之願也倘得斯人則予之贈言無踰此矣

癸酉閏秋碧梧病叟敬書

定齋先生汪公一龍墓銘 方回

自孔子以來歷周二程張始有紫陽朱子昔金人入中

原知孔子為聖人猶護視孔林莫敢毀德祐乙亥吾州
成將李銓懷貳作威撤傍城屋為城守斧紫陽書院薪
之以辱多士不旋踵天報之罰身殞家滅然書院由是
夷為藋棘者四年蓋新安以書院奉朱子祠如魯之事
孔子孔子廟徧天下皆原廟也魯為重朱子祠徧天下
新安為重興之者郡守上饒恩軒韓公也復之者郡人
定齋汪公也彼廢之者一無知之小武弁何足齒復之
者與興之者關於名教甚大今汪公亡矣足與韓公同

不朽是宜銘之於墓以詔永久而況公學雖博知所宗
仕雖淺知所從知己雖衆不輕於容皆宜銘按狀公諱
一龍字遠翔徽州休寧人曾祖體仁知房州竹山縣祖
汝鑑父茹迪功郎母吳氏封孺人公妙年英發文數理
窟窮研深鈎當魁鉅淪喪之後士所為隨時汗下浙學
屏息而江西之學稍稍鼓行末既卑而本尤舛朝廷乏
儒相場屋循偏私濂洛正論幾壅公固守紫陽之傳不
少屈淳祐壬子寶祐乙卯年二十三二十六連以經甲

鄉薦景定辛酉又領浙漕貢值春官有尚陸而疑朱者
壬戌由京庠升上庠咸淳乙丑入禮部丁父憂戊辰廷
對賜進士出身所以發譽早而登名遲者文衡不純一
也初授瑞安縣尉改句容當權臣擅國之際達官不憚
吻舌冀痔惟公官卑志行嘗攝縣癸酉五月歲大饑倣
朱子南康遺規為便民十條民無瘠殍秩滿陞從仕郎
部注婺州教授乙亥淮閭李公庭芝辟泗州判官留幕
時京口瓜州失守公奉母航海南歸鄉守王公積翁辟

判官鼎命草丙子休寧士民推公為宰不就遜朱頴達
為之完鄉井平寇盜皆賴籌畫方事之殷陳公宜中留
公夢炎為相有朝為選人改秩暮為州郡監司臺諫者
予在朝嘗獨薦公都督府叅議俱退卻不前李銓乃子
漢英之變有以白衣領守貳者屢強公宰鄉邑終不就
皆以母老辭至元戊寅江東道按察鄂通公以紫陽書
院山長提學事起公顧書院瓦礫盡矣並命者曹公涇
叶心疲力得南門外江東道院故郡學基別為新書院

馬公知己滿世書其大者丞相馬公廷鸞求塾客予言
公可公已第需次訓丞相諸公子矩度嚴整講授精切
尉缺至不戀相府可速化竟棄去至如予太常應詔特
舉公一人公若無所聞公於學於事於知己可不謂內
之養也粹而外之省也密乎公事親尤盡孝母夫人年
開九袞侍藥廢食寐前後居喪皆骨立家築樓曰經畬
貯書萬卷弦誦之室曰定齋使究老壽浩涉淵詣於道
涯聖闕未見其止也生以紹定庚寅四月十八日以至

元壬午正月十九日卒年五十三夫人曹氏歸公四十年婦道全母道備生以寶慶乙酉五月二十五日以至元丙戌五月初三日卒年六十二子男三人蒙進義校尉建寧路建陽縣主簿良德慶路儒學教授巽元漳州路儒學教授男孫八人伯埴孟堅仲簾益社美孫希著孫葆孫女三人曾孫鰲諸子以母夫人卒之年十二月庚申合葬於松蘿山豐林之源據允揖外公詩文多散落句容策三卷四六講義各二卷僅存予長公三年擢

科偶先六年早同出郡守靜齋魏公克愚之門中年漫
仕俱不逢晚節休官窮居里中無可與語輒思公而公
僊去十餘年矣銘誼不得辭銘曰

學失所宗業精易荒仕迷所從名羶弗芳知己常至於
誤已集不如翔公能察於此三者雖死兮猶有耿光昔
嶽麓書院廢乾道中忠肅劉公復之于湘白鹿書院亦
嘗廢矣淳熙中朱子復之于南康彼以十連二千石之
力曾何難鼓動於一方繫是紫陽起仆植僵孰愛我而

助我突儒宮於戰場松蘿之岡斯銘不忘亦何異刻鼎
彝而書旂常

艮軒先生俞公

君選

墓誌銘

江

雷

鄉先生艮軒俞公卒二十年其孤若思譜公宦歷出處
大槩緯以賦永之歲月屬為墓銘父之執不得以不詳
公行為解公諱君選字憲可世家徽之婺源有繇六館
前序典教鄉邦者掇正科終淮郡倅者在公皆為伯仲
公會祖雋祖天瑞父元弼從江閩奏辟幕屬幼授公易

家學也少長為文跬步規矩景定壬戌第進士三甲選
主隆興府武寧簿自陳母高年乞便迎養改尉饒州餘
干垂滿以憂去服除授揚州司理為應山李公客入淮
東制幕已而沿檄徑歸徽守三聘不就遂終老焉公襟
度粹夷其接人和氣溢於顏面詩多似太白而自律之
嚴臨事剛果直有峻立千仞者初攝宰安仁議新邑學
或以公儲空乏沮之公首輟俸稍捐家帑人乃欣佐其
役不日而成維揚將校婁忠者殺人事覺制閫憐其才

欲置末減公爭曰人才可復得國法不可暫偏卒正典
刑他日閫帥謂機幕程應常曰吾未見剛者今於俞掾
見之癸酉維揚真泰俱歎公建議發府廩賑饑真泰皆
襁負而至或議格之公曰率土皆王民奈何以隣州為
限白使者均給活三州人凡數十萬他如立江都漁湖
之租民遂免陷於罪撥安仁衣糧就邑給贍宗室弓兵
皆實受賜其猷為卓然可紀者類如此而急義篤交有
古道蕭閒醞藉不受俗塵用是丞相文忠公丞相番易

公以暨東澗蛟峯諸大老稱許如出一口歸隱艮軒常
曰時止時行艮之義也在我法當止耳吾何為不樂哉
所為詩文若干卷曰艮軒小藁藏於家至元丙戌九月
日卒生於嘉定八年八月至是七十二矣娶江氏繼戴
氏皆貴族子男二若愚先公卒若思優於學行有職府
庠孫男五人越翁惠翁鶴翁同翁慶翁女孫一元貞乙
未始得地永川之南曰西館大德癸卯筮築壙之日吉
時則有戴君某哀而資之厚葬明年十二月日江氏戴

氏之樞實附銘曰

寬而栗行有德時行止辨乎易猗歟先生後世則宜爾
子孫慶無斁

新安文獻志卷九十五上

欽定四庫全書

新安文獻志卷九十五下 明 程敏政 撰

行實 文苑

徽州路儒學教授唐公 元墓誌銘

杜 本

龍集丁卯予遊吳庠識唐長孺時長孺司糾錄英譽籍甚恨未知其細後十有七年乙酉辭召江浙歸武夷山中長孺子仲設教崇安不特識其父抑知其子之賢遠

於人噫單居塊處悠悠爾思安得與而父子接哉仲寓
書幣偕善狀一通而告曰先君不幸於己丑夏四月卒
于正寢臨永訣把筆作淡墨字命孤不肖葬而不得杜
先生銘如不葬也零丁羸疾不果離苦次足跣以請惟
先生諾而銘之按公諱元字長孺新安歙縣人總幹廷
瑞之從孫其上世俱以文章起家譜系中絕考君諱虞
又以婺源李氏出後于唐故德宗遺胤至今池曰飛龍
橋曰太子以爲左驗云公狀貌魁梧德量軒豁與人無

疑咳其於天叙孝友最隆者也初貧屢阨于衣食既長
方奮迅劇切以詩自鳴中值朝廷以魏科收多士浸灌
經術探賾史籍挾其所有四戰輒北遂屢以明經試有
司又不第乃棄舉子業以古文鳴於世此學業之可表
者也筮仕吳庠髮已紛白五十八省授平江路儒學錄
再調分水縣儒學教諭陞南軒書院山長以徽州路儒
學教授致仕廩稍率削弱不克自振遇春秋祭祀蘋藻
潔虔待學徒侃侃講說無怠此又履歷次第之可攷也

嗚呼凡今之士學業履歷未必加公科舉即標甲乙為學官掇青紫迂回沈鬱固宜憫悼然天之陰厚於公者人未易曉也康強矍鑠以盡交四海王公大人博覽淳蓄以成其學以教其子以及其學徒猶公之貴且顯也遭時承平杖於鄉坐上座謁其門者車轍無虛刻聖天子仁化天下崇尚耄耄賜以織文一端再賜以織金龍一端以華其躬以卹其家其榮何如哉較今士德不足以稱其位才不足以符其名往往取敗姍笑於時者孰

得孰失蓋易知也嗚呼公之詩文霽霽敷腴不事險澁
詩慕陶杜黃陳文入歐曾而卒於臨邛有得也詩文五
十卷藏于家其平生相知如建德路總管方公回徽州
路總管孟公淳中書大叅王公士熙南臺侍御史張公
起巖翰林待制楊公剛中題品具載序跋其死也中書
叅議烏古孫公良貞禮部尚書汪公澤民監察御史張
公止秘書監丞彭公炳賻贈千里以致其哀春秋八十
有一唐氏之曾祖諱大有曾祖妣朱氏用長子廷瑞恩

封孺人祖諱廷雋宋登仕郎弟兄四人曰廷瑞免恩主
遂安簿轉銅陵丞曰廷堅曰廷秀明禮記請鄉舉李氏
之高祖諱冠之曾祖諱尚禮迪功郎祖諱玘以書魁與
丞相程元鳳聯榜考諱虞也周禮試得待補妣程氏弟
二人輝廣東道肅政廉訪司書吏成早卒配徐氏慈祥
端重為九族師受恩帛得年八十有二於是年八月廿
又一日合葬於歛之藤源男六人長徐卿詩益工次琪
次堅次存真次即仲銓南雄路儒學正次芹芳女二人

長適吳岩壽次適張琬孫男十人孫女三人曾孫男一人愧予老邁文思刊落繁其辭讀其狀不必存焉可也約其旨讀其序不必狀焉可也敢不諾而銘諸銘曰

粵稽古氏陶唐善善繼聞弗彰百代下道益光具在我用必張時不偶吁可傷年八袞須眉蒼帝賜老恩澤霽出雲錦雙龍翔維父子擅文章名鴻鴻連四方曷告哀銘斯藏

序洪杏庭

焱祖

集

危素

杏庭居士集故徽州路休寧縣尹致仕洪先生所著詩
文也先生諱焱祖字潛夫年二十有六為平江路儒學
錄浮梁州長蘄書院山長紹興路儒學正調衢州路儒
學教授擢處州路遂昌縣主簿天厯元年年六十有二
致其事去明年卒于家此先生之履歷也其為學官興
修學舍其佐邑富民不敢踏門土豪強買民田不收稅
一為正之甲或毆乙瀕死反自斃其面以誣乙冀脫其
罪先生卒坐甲訟由是息囹圄為空浦城偽鈔誣遂昌

富者十有六家尉卒持公櫬至先生立遣之南有大溪
遇霖雨不可涉乃捐廩祿為之倡作長橋夏旱禱於龍
湫輒雨此先生之為政也初先生謁宋尚書方公逢辰
于建德方公大奇之其後客杭師事建德守方公回建
德與先生同郡先生之生父程公建德同舍生也客信
從故教授四明戴公表元游至若高郵龔君璠吳興姚
君式南城李君淦皆東南名士則又與之同僚此先生
之師友也由是觀之先生終始可得而知矣先生既歿

其子在述其行以先生踐履純篤為政清慎還回半生
位不充其才為痛予則解之曰前史所載丞相御史大
夫大將軍名姓相望其穹官峻爵焜耀一世論其所可
傳則蔑如也先生之文根極理要而憂深思遠超然游
意於語言文字之表彼丞相御史大夫大將軍雖尊顯
寧有是哉然則為在者可以無憾矣先生所著別有續
新安志十卷爾雅翼音注三十二卷已刻于徽學其所
居有銀杏大百圍故以為號因名其集云在以門廕為

征官今調浦江尉將去京師屬予序其篇端迺為之書
至正九年七月己亥應奉翰林文字文林郎同知制誥
兼國史院編修官危素序

松江府知事俞公

師魯

行狀

程

文

公諱師魯字唯道姓俞氏其先河間人有諱縱者從晉
元帝渡江為征西大將軍遂居于歙至梁安州刺史藥
六世孫昌始家婺源子孫或仕或隱世族甚盛宋連水
知軍倫之後有諱猷仲號西鄰老人者最為朱文公所

推敬公卓悟秀挺三歲能識奇字知讀書日誦數百千
言年十二哭母哀絕人不忍聞比壯講學邑庠深自刻
勵不讓先輩太學博士遜齋吳公某一見異之時公兄
有女未字公曰向見諸生莫賢俞某者遂以歸之三十
遊江淮間名聲籍籍戶部尚書某郡張公彬奉詔整治
東南鹽法之不便者以書召公公即為條上方略請立
倉以貯鹽設官以運鹽聽商賈詣倉以次交易便張上
之朝即日奏可行之由是大為張公所器重大德十年

江浙行省薦公行能應茂材異等江東使者涿郡盧公
執事亦察公材學可任館閣薦之召試禮部翰林集賢交
章辟署史館編修會權貴臣欲鉤致公出已門下公謝
不往銜之章寢公亦以親老求外遂授龍興路儒學教
授至則籍錢糧選直學之廉謹者掌之斥逐姦蠹鑿泮
池新齋舍禮師儒增弟子員士風翕然過者嘆曰此教
官朱子鄉人也二年江西行省議舉為掾丁外艱服闋
家居十年至治中除廣德路儒學教授舉職如龍興召

人墾廢地歲增學糧五十餘石教雅樂置祭器以崇祀
典諸儒鑱之石秩滿赴選有貴人識公姓名即除兩浙
鹽運司知事猶以公前張尚書時議鹽法便故其子力
請父且老不勝繁劇改松江府知事松江涖華亭上海
二縣事夥如大郡歲賦米以百萬計軍儲海運所須華
亭地下水田米多白上海地高米多赤省檄欲一切徵
白米府尹山東李公某下令如檄上海民大戚公適至
歎曰物產異宜李侯誤矣然事急不可以請且令即下

乃以便宜擊羊置酒召三軍帥飲告曰將軍生長平世
無一日汗馬之勞而軍士坐受國家贍養恩至厚矣然
所贍養皆仰諸民今上海之民奉省檄欲一切徵白米
罪且及身而白米卒不可得假今得歲籍為常民將奈
何將軍幸而聽某請以上海之入給軍士華亭之入輸
海運為百官之祿則將軍有奉公之忠小民無倒懸之
苦所謂惠而不費者也幸將軍圖之三帥皆跽曰某等
武人先生幸見教敢不聽從明日以文書來收米如他

日民間食鹽以口計吏並緣漁獵逮及鰥寡公廉問拘其籍焚之初富民失火移其貲里中少年林闢保率其徒夜竊取之坐以縱火劫掠當死四人瘐死七人械繫獄中公閱其牘疑之一日列七人庭下屏吏好問曰汝等得無冤乎皆俛首泣然流涕曰無冤公益疑反覆詰難具得情實公喟然曰我職在案牘前人以死罪遺我不能生之是我殺之也抱其牘白部使者尚公某使者立喚七人詳之驗即為破械出此七人曰活汝者知

事也七人號泣羅拜當是時當塗之人無不稱俞知事政績者府中為之歌曰俞公未來案牘紛披吏饒而欺俞公既來官僚怡怡吏飽而嬉惟其黑幘使我心惻公聞笑曰吏尚飽邪吾今使汝飢矣府中事無大小須公一言而決他郡獄不決上省憲者亦交委于公椎強踣姦上下斬斬嘗以事怒責屬吏吏急求解公諸子諸子從容從旁切諫公良久引起曰汝胡不坐此諸子懼莫敢復言其矯抗不私如此又明年以疾卒官公風骨清

秀善談笑好賓客家故饒財先世好施無餘貲聚幼師
事鄉先生王公太古齊公節初雙湖胡公於書無不讀
至於陰陽醫卜亦所通究晚從方總管回學詩文盡得
其說方公將死悉取所著書授之故人謂公之學高如
王正如齊實如胡博如方卓詭乃其天性有易春秋註
說未脫藁藏于家平居矍然儒者及當官治文書又刻
深老姦吏縮手自謂莫及初公之生也父夢阜衣數人
擁吳江知縣上謁方延坐語婢子走告曰夫人生男矣

遂覺及病迎醫公追占其夢曰吳江即松江知縣即知
事也吾必不起比吾死其在生之日乎即以八字戒諸
子其六言家事其二言喪葬公生宋咸淳己巳十一月
二十一日卒皇元至順癸酉十一月二十日享年六十
有五曾祖宋禮部進士祖某以隱德稱鄉里父某弱冠
鄉貢進士會宋亡築雲隱山房終身不入城府娶延陵
吳氏女出宦族有賢德後公若干年卒子六人倚相逢
年昌言宜生拜都然明皆能世其家次子逢年尤為中

朝公卿所賓接天歷初因大臣入見文宗皇帝親被顧問將命之官會上崩今為江西榷茶都轉運司照磨孫男十人女十人諸子以至正四年正月某日奉公夫人之柩合葬于里之洞靈源將乞銘當代大賢君子刻諸墓以存不朽請為狀其梗槩以俟執筆者擇焉

潘節齋榮傳

家乘

潘節齋榮字伯誠婺源桃溪人隱居博學通諸經尤長于史嘗著通鑑總論大要以為治天下有道親賢遠奸

明而已矣治天下有法信賞必罰斷而已矣治天下有
本禮義教化順而已矣明則君子進而小人退斷則有
功勸而有罪懲順則萬事理人心悅而天下和三者之
要在身身端心誠不令而行矣其說反覆數千言又嘗
集蘇句一百篇危承旨太樸為之贊學者號節齋先生
其歿也桃溪人祀之于社至今不絕

序鄭彥昭潛集子居貞

程文

鄭潛字彥昭歙縣人同郡程文序曰彥昭詩森然而

武庫之兵渾然而崑山之璞沛然而春江之濤金石奏而囂洗陳何其能言而文歟蓋駸乎格高律熟而入於精者矣雖然彥昭博學長才由廣東帥府從事上計京師遂辟監修國史掾厯臺及省擢端本堂正字侍皇太子東宮一年拜監察御史方將昌其志氣以施諸政事之大豈特詩之工而已 宣城貢師泰序曰閩海僉憲鄭君彥昭長身疎髯負氣高義讀書芙蓉五嶺之下足跡未嘗一入城府也及出則度浙江上會稽涉彭蠡

泛洞庭望匡廬九疑之雲登祝融踰嶺嶠以客于南海
然後北走曹衛齊魯燕趙之墟以官于京師凡其高深
遐遠怪奇壯麗之觀既有以資夫超見絕識而又出入
禁近校書儲宮戕冠珥筆以清百辟綱紀天下乘風雲
依日月凡其卓犖奇偉剛方峻特之行又足以徵諸事
業故彥昭之為詩於行役於攬轡隨其所得莫不各極
夫趣之遠體之正聲之和焉然則彥昭豈苟作者哉觀
其詩可以得其心之所存矣今彥昭方佩使者印按行

八郡廉車所至奇袤屏息識見宜日益超事業宜日益
廣他時播之聲詩以鳴國家之治者又不止是而已希

古送河南叅政鄭公序古之所謂賢公卿者方其居乎
閭里羣乎庸衆人之中其身已隱然負公卿之器庸衆
之人亦皆以公卿望之惟恐其得位之晚也是以一旦
起而處乎位任天下之才理天下之事若行乎家人子
弟之間而成於笑談指顧之頃未嘗疑於心而滯於用
故士有不出出則必為當世利而當世亦以出處為休
戚聞其居位則相賀以為得人自夫古道之降士之負
名實過乎人者固寡世被士之利者尤寡於是上有不
勝任之憂而下有不稱其位之譏夫以賢者而居乎大
位宜也以不賢人而居賢人之位夫豈宜哉以予觀乎
今之世若新安鄭公之為河南叅政蓋宜乎其位者也
公之先祖父皆嘗為顯官聞譽甚著公自少尤好學有

美才所師友皆當時名人問學操守見稱諸公間人望其為貴富器也久矣及國朝興賢圖治由禮部郎中出叅河南之政舉措弛張不大聲色而數千里之間吏民稱頌其美如出一口及其終三年而去咸以弗能留公為憾予由是知士之不可無學而賢者之利為甚大也國家之用公與公之為治何其近古也哉抑吾聞古者宣德澤之臣為吏民所宜者有增秩賜金之令而不忍奪之於他職使此法也復見于今河南吏民其尚可賀也夫洪武二十三年三月某日序 楊學士守陳續構讀書巢記古者未有宮室民皆巢居而穴處後世宮室既備而妖僧怪民猶有巢于松巢于海棠者至有高人韻士乃有命其室廬為巢若林景思之雪巢陸放翁之書巢是矣福之瓜山鄭氏其先居歙之長齡里代生俊髦在元有諱潛字彥昭者廉訪經歷紹之子閣門宣贊天麟之孫宋王官教授顯文之五世孫也嘗築樓以為讀書之所其鄉先生鄭師山玉命之曰讀書巢而為文

以記揭文安公侯斯為大書其扁後官閩海道廉訪副使嘗於瓜山建義學為義渡皆置田以給其費民戴之故其子河南叅政居貞遂即瓜山而家焉今叅政之孫培叔攻文砥行又昌其貲乃於正寢之側築樓三楹左實以五經四書與凡性理之書曰師心齋右實以羣史百子與諸名人之集曰樂此軒而虛其中以游息合而名之曰讀書巢取文安之扁與師山之記揭之其子弼以鄉舉高第至京師偕吾友進士杜宗岳謁予文識之惟瓜山之距長齡培叔之距彥昭地與世皆遠矣而向之一文辭一字畫皆能視若夏璜周鼎世守而不失今築新樓冠以舊號蓋以見先世之流芳而迪後人之趾美也厥子若孫尚無忘祖考之志日厲月策彪炳其文章崇大其德業以丕宣憲副之光則是巢之所出者皆為威鳳為祥鸞揚名聲於高岡而振羽儀於霄漢將見天光下臨巢燧乎其有耀矣

詹中書

希原傳

家乘

詹希原字孟舉婺源龍川人承旨同之從子也以字學名世仕元為供奉監照磨歷善用庫大使洪武初授吏部奏差鑄印局副使升中書舍人陶九成云希原正書師虞永興富有繩墨其字愈大愈好楊文貞公云國朝大字希原為第一蓋兼歐虞顏柳之法而有冠冕佩玉之風者弟希愷仕元為台州學正山東元帥府譯史調易州同知歷大都兵馬指揮從順帝北去不知所終

前翰林修撰承直郎同知制誥兼國史院編修

官同知耀州事鮑公頴行狀 唐文鳳

公姓鮑氏諱頴字尚聚歙西之棠樾里人也其上世自青齊來歙凡再遷至棠樾世以儒宦顯曾祖諱周以子貴贈從仕郎徽州路黟縣尹周之父壽孫當至元丙子之變里中盜起賊執其父欲兵之壽孫出願代父死父願代子死賊哀憐之不忍殺父子俱得釋人稱為慈孝鮑家事載宋史孝義傳祖諱同仁以右語出身五轉至

會昌州同知致其事考諱深講學鄭子美待制之門為
構師山書院以延鄉里學徒遂領府檄攝山長事公幼
聰敏不凡甫成童讀書知大義能詩文精字法道勁方
整旁攻篆隸及長從遊於張子經胡孟成鄭彥昭諸先
輩山長公築耕讀堂以延賢士大夫而風林朱允升白
雲唐仲實石泉周彥明日夕過從相與講求誦習由是
見益明識益高值壬辰淆亂世家大族俱被剽掠刼奪
而公之故居悉遭焚燬無遺丁酉我天兵東下克復徽

城而主將鄧愈索鄭待制待制以嘗受元官遁去公遂
代係于獄索之愈急度不獲免待制乃挺身而出見主
將抗辭不屈主將禮之釋公待制語于衆曰吾得死所
矣山長公與弟以仁受業師山最久不忍其死公奮然
進曰先生既受前朝待制之名雖不食其祿而受其爵
豈可屈辱臣異代乎待制曰頰之言是矣吾計已決明
日衣冠北面再拜自縊死異時待制得登名於元史忠
義傳雖其平生學力所至公亦可謂賢弟子矣已而世

運平定詔求民間有才德賢良者太守王公以公名聞公以親老辭不允逼迫就道賦啼烏行以見志至京吏部引見上于西苑詔公與晉王傳桂公彥良十人同舍尚賓館編史傳進呈畢賜白金五十兩帽履衣各一襲授博士廳典籤明年春監築太社太稷壇成時初立翰林國史院改除編修官洪武改元學士陶公主敬稱公質實有文陞翰林脩撰承直郎同知制誥兼國史院編修官上嘗御謹身殿親策問廷臣曰北平建都可以控

制儼外比南京何如公對曰元承遼金之舊立國在燕
蓋地氣天運各有所宜不可因也今南京興王之地宮
殿已完不必改圖傳曰在德不在險也上又嘗策問久
任之法公以借寇故事對皆稱善一日上登鍾山命詞
臣扈從上御擁翠亭給筆札即景賦詩公與翰林朱升
張以寧秦裕伯起居單友中李某鉄冠道人俱應制上
親倡和遊崇福寺錫宴而還時尚書張復初以吏疾儒
適陝西內附遂出公為耀州同知州兵戈之後飢饉屢

年流民未復迺披荆棘以臨政歲大飢朝廷發粟以賑
公親領縣民赴孟津給粟宣上德意至秋方稔一新官
解民爭趨事不待程督旬月落成博士金華王公子充
記而刻之張氏偽官許王者結黨害民有王寅罹其害
公不避危險率弓手盡擒之以送行省右丞耿公大加
稱賞境內獲安淳化縣與州鄰縣有奸逼民虛增田土
頃畝以媚上父老訴于會府委公覈實迺履畝而徵去
虛增糧萬五十石同官縣民偽左丞趙某掠平陸縣民

張氏女年十三訴於縣不能直公執諸廷歸其女洪武四年秋奉表上京欲順道省親九月十四日光祿錫宴越翌日赴禮部辭俄被拘送刑部轉送羽林衛乃知西安府經歷常達坐事誣指凡陝西一道官吏無虛實小大皆不免至十月十五日獄中上表陳情不報時從叔任留京不忍去為製衣饋饌及死買棺載骸骨歸其鄉公臨終親寫遺文付其子宅相丁寧戒諭文辭明暢字畫嚴整不異平日公先娶程氏宋狀元程某之曾孫女

性柔順盡婦道年十九歸公臨蓐而沒繼娶宋氏甫一月而公有薦舉之行在耀州嘗相謂曰設若不幸汝肯守志乎宋泣曰婦人從一而終豈可事二姓公笑曰吾無憾矣聞公之訃哀慟號泣抱一歲幼子匍匐走數千里見者莫不感動既抵家公姑康健在堂具甘旨輸孝敬經紀其家政公姑安之視前室之子不異所生子亦奉之如親母時戶役煩多支費不給宋之父母憫其蚤寡欲奪其志終不聽公姑俱以天年歿宋營喪事盡禮

宗族姻戚咸稱之里耆老以貞節聞得旌表其門程氏生子一人即宅相女一人適某宋氏生子一人曰長安七歲而卒宅相有子三人長玄英次玄寧三玄復曾孫男若干人公得年四十以永樂某年葬績溪縣之株木嶺嗚呼天道難諶善惡之報禍福之降何其不以類應邪豈囿於氣數而值於命歟將詰諸司造物者其然乎其不然乎申包胥曰天定能勝人人定亦能勝天其果然乎公之罹非辜亦可悲矣三孫念公嘗躋門而請曰

先祖行實未有紀述當時儕輩俱已漸盡無一在者惟先生獨存若有待焉敢請予諾之老淚危迸哀思填胸每一執筆悲不自已侵尋歲月弗克成文迺忍慟而書之尚干當代名公矜憫而銘之謹狀

余縣丞鏞傳

吳斌

余鏞字子韶鳳湖人其先世自唐至元為休之大族父同知公亮豪縱不羈宦游南北家產蕩盡以死鏞自幼力學年十三則寓館於鄉以贍其家事母以至孝聞嫁

妹三人撫三弟長而為娶室閭里敬慕之稱為善人縣令唐公子華揚公文舉皆造其門致餼廩焉然為人養高自守不為世屈見富貴者則倔彊愈奮是以不能伸其志皇明洪武四年以賢良徵為開封府滎澤縣丞到官即有政蹟聞於京師郡慕其清民感其德後提刑按察至其邑亦以不屑遂枉以法至不屈而死朝廷為雪其枉欲官其子卒以無嗣而止號尚友齋有詩文行於世其詩壯麗頓挫為時之所尚云

金仁本

德珪

傳

蘇大

金德珪字仁本休寧汪坑橋人家世業儒至德珪而貧
好學手自抄錄箱帙滿家雖飢寒困苦手不釋卷六經
三傳諸史百氏山經地志醫卜神僊道佛之書靡不研
究世家士族爭為西席子弟經其訓誨悉有禮度嘗以
先儒遺書精神心術所寓湮沒不傳為已任遍訪藏書
家得陳氏四書口義批點百篇古文倪氏重訂四書輯
釋朱氏九經旁注趙氏春秋集傳上虞劉氏選詩補註

胡氏感興詩通三十餘般抄校既畢遣子輝送入書坊
刊行天下劉用章先生深嘉其志平生著述有新安文
集十卷道統源流程朱氏錄小四書音釋卒年七十二
贊曰文風既變俗尚商賈視著述若敝屣德珵奮不顧
流俗肆志聖賢之學求書之心急於衆人之求利家愈
貧操愈礪先儒遺書得不湮沒後生小子知所趨向皆
其力也

亞中大夫湖廣布政司右叅議方公勉行實

家乘

先君諱勉字懋德世居歙西潛里四世祖諱開先元明
經中試江浙省提領揚州高祖諱應午號梅山曾大父
諱嘉甫大父諱宏遠父諱永進隱德弗仕先君自少穎
敏嗜學年十二三作為詩文如老成人語永樂六年補
郡庠生後三年捷鄉書十三年乙未登北京首科進士
第選入翰林為庶吉士與一時登瀛之士同食大官待
用禁垣尋奏回畢姻陞辭命兵部給脚力又錫寶鈔為

婚禮費十四年赴南京復任十五年扈從北京尋丁外
艱二十一年服闋洪熙元年至京除行在太常博士念
母在堂乞所食祿原籍關支以代養宣德三年授勅命
贈父文林郎太常博士封母謝氏太孺人贈前配汪氏
封繼配汪氏為孺人屢進應制辭賦蒙恩賚甚厚五年
乞歸焚黃省視次年丁內艱起復之任正統二年授行
在四川道監察御史劾都御史李儀巡皇城四門審獲
權奸王振家人即日上聞巡五軍教場覈奏鎮遠侯顧

興祖并彈少保兼工部尚書吳中薦舉非人正統三年
春出按江浙值鄉試考官互爭首選先君遍閱各經魁
試卷惟春秋獨優取居第一及開彌封乃桐廬姚夔即
今吏部尚書事完回朝力言浙江急務莫急於防倭而
防海都指揮張翥年老且貪不堪備禦者乃誣先君嘗
需海濱之物致生謗言俄而倭寇登岸肆行殺虜報至
京始信先君之言明年陞湖廣按察司僉事往巡湖北
等郡詣五開整飭邊務問奸吏數十追徵侵盜屯糧二

萬石正統九年永順宣慰使彭世雄與桑植安撫使向晟有隙誣奏世雄僭竊朝廷累勅往治先君至辰陽密遣人微行觀其虛實世雄聞之驚疑欲變先君不避艱險躬詣其境召其屬南渭等州并各長官司官吏審訊之果無僭竊之實遂上聞錄晟之罪十二年奉勅督襄藩二郡王府十四年獨掌按察司事時值浙江福建賊情緊急京師多事憂形於色食不下咽兼以苗蠻猖獗攻破城堡劾都指揮畢通等失機事上命取各官招伏

戴罪殺賊是年夏復巡湖南等郡添選軍餘民壯操守
城池設法獲偽賊朱貫等差人馳奏處死邊民自是知
懼不敢為惡九載秩滿赴京景泰元年秋授誥命階勲
奉政大夫修政庶尹加贈父為湖廣按察司僉事母妻
俱加贈為宜人十一月陞湖廣布政司右叅議食正四
品祿二年四月莅任遇連年用兵攘捕蠻夷督運糧儲
以濟大軍六年進聖節表赴京陳言二十事曰養民固
本曰推舉孝弟力田曰審賢擢用文臣曰論功陞用武

臣曰優待守邊將臣曰推選老成化民弭訟曰崇禮南岳神祠莫安南土曰建議行都司鎮壓苗蠻曰租賦額重量折輕齎等事時英廟在南宮先君所陳言有曰堯舜之道孝弟而已其諷諫之意溢于言表天順元年兩考赴京以年衰乞致仕未行二年回任又因旱傷條陳豫備邊儲三年授誥命進階朝議大夫四年蒙允致仕之請先君自歸家園與世利不相闕拳拳以仁義忠孝訓教子孫雖當桑榆晚景猶手不釋卷八年朝廷優老

奉詔進階亞中大夫六年二月二十五日客有至者先
君與之談論當世務亹亹不倦因呼諸子曰我平生為
人惟一忍汝當謹記勿忘是夜疾作甚亟然猶動不違
禮至黎明起盥就床而卒生於洪武二十六年癸酉二
月五日卒於成化六年庚寅二月二十六日享年七十
八平生所為詩文有怡菴集十五卷行世葬郡城西龍
王山子四人旭暎早曇暎景泰甲戌進士早成化乙酉
鄉貢進士浙江臨安知縣

中憲大夫陝西按察司副使莊公觀行狀

張楷

明理屬詞謂之學成已成物謂之道篤行孝弟謂之行
三者一理而已能盡此者吾於友兄莊公見之公諱觀
字居正歛之莊村人年十四執父喪有禮弱冠游郡庠
才識穎敏讀書過目成誦同輩皆推讓之永樂辛卯以
春秋應鄉貢明年會試中乙榜分教浙之義烏公素明
理善屬詞造就弟子有法歷三科得秀士八人皆為世

用滿考優等陞辰溪教諭一以教義烏者教其弟子文
風翕然未幾丁內艱起復赴京擢國子學正弟子居座
下者皆知明理屬詞出而從宦悉能推公所教以措諸
用正統改元新制每省以憲臣董儒學治大臣各舉所
知大司馬王公驥以公薦擢陝右按察僉事董八郡秀
士以督其成公首立教條次嚴紀律務期成德達才之
效陝西疆里散闊山川險阻公不憚勞苦歲一躬莅必
得其實以故八郡士子爭先奮勵以學成名為期若咸

寧揚鼎之中會元與蘭縣黃諫鳳翔劉俊相繼賜進士
及第皆入翰林有名其他第進士者屢科不缺咸著英
譽若都御史王竑任寧之類予嘗與公同出行部曰學
校以明倫為先文章末事耳郡縣遵其化雖孺子村夫
皆尚廉恥公德所致也諸生有聰慧出衆進益學業者
則喜形于色愛養如至寶語予曰西人得此實翹萃者
也吾獎之以礪諸子俾各觀感以盡力其造就人才類
如此九載秩滿例得陞秩今少保吏部尚書東閣大學

士王公時以都憲出鎮關中恐公之去而士子失望特
為之具奏陞擢本司副使仍董學校之政又三載是為
景泰改元奉表赴京遂上書乞骸骨既得請則挈其男
女還鄉公自筮仕即迎其母宜人赴義烏恪盡孝道又
陞辰溪母歿哀毀踰禮復以其餘葬無力者十餘喪今
引年歸老益篤孝義念兄璿同祖同弟興同相繼淪歿
諸孤幼穉公斥餘俸分給之教育無異己子有餘則濟
里中貧乏及修橋梁道路以利衆人而於家廟之制則

拳拳焉務勝他族歲時祭祀必備禮物極誠敬亦為他族所稱公之曾大父天錫祖廷璧皆隱德弗耀父永寧以公貴贈奉政大夫陝西按察司僉事母張氏配余氏應天府丞同邑士敏之女淑慎貞潔表儀閨門先於正統庚申二月三日卒享年五十有二與母張氏皆贈宜人子男六徽專理家務歛以麟經中辛未進士授河南道監察御史宸為商治子母以足用度楚附名縣學屢試鄉闈未第吉泰俱長務學女義貞適士族余永壽孫

男八道謙道傳道彰道暹道英道充道濟道桓孫女三
泰貞福貞琬貞公無恙時常見里族中生子迨長昆季
皆析食爭競其禍起於異姓相聚乃訓飭諸子絕私蓄
杜爭端共立誓言有弗遵者致罰及訓諸子不許輕至
公門而已亦杜門謝絕世事凡三年矣忽今歲春三月
以來遍歷鄉閭探候親友及歸以疾告俄頃遂卒實景
泰甲戌四月十六日也公生於洪武丙寅十月二十三
日享年六十又九嗚呼公之學明理屬詞足以潤身而

華國公之道成已成物足以輔世而長民公之行篤行孝弟足以化囂暴悖彞倫而推其緒餘又能惠鮮艱窘利濟道途以教子之義方致鄉人之慕效是皆可書者也恨予索處千里生不能共引觴之樂死不聞屬纊之言殮不憑棺葬不臨穴平日道誼之孚心氣之合有若異姓而骨肉者今也邈不相顧如秦越之遐視然是宜痛悼而深恨者猶幸欽以御史出巡不忘故舊訪于林下歷叙舊情恍然接公之顏範聽公之言論庶得少伸

憤鬱也別經一月歛以公訃告不覺老懷作惡血淚交
下狀言之請豈可以他詞拒哉遂投淚書此以為立言
君子取信時景泰甲戌五月既望前都察院右僉都御
史慈溪張楷狀

可筠吳先生

以恭

墓誌銘

鮑

寧

宣德正統間新安郡城中以文學老成稱者四人曰養
正江先生夢草曹先生西清張先生可筠吳先生皆秉
志高尚不苟於同俗者也然皆與予為忘年友而有文

欽定四庫全書

新安文獻志
卷九十五下

會之益無何養正被薦赴京師辭不獲授都察院檢校西清構別業在宣城晚年遷居之夢草亦先卒獨可筠先生歸然如魯靈光曩年登八十適刑部尚書楊公致政歸倡士林賦詩為壽斯文之慶甚可樂也迨令甫二載而先生遽卒邪先生以天順己卯十二月十二日卒享年八十二遺命喪祭依朱子禮又命其子鈍告予別以銘文屬卒之三日訃至予往哭弔畢乃叙而銘之先生諱遜字以恭可筠其號也方年少時好問學有能詩

聲出語清奇不與時俗類尤工樂府歌曲比壯挾貲貨
遊武林姑蘇及金陵所至名士請交聲譽藉甚迨年三
十餘即家居益用心溫舊學東嘉史伯璿有四書管窺
資中黃楚望有六經補註先生喜其擴先儒所未發皆
手錄而精究之晚年學問老成為文章有理致士大夫
家於禮文稽古事有疑者多以咨之郡行鄉飲酒禮先
生正賓席肅儀度言辭清灑高下中則文武官僚咸敬
愛之僉謂先生於斯文可以無愧矣曾祖諱通祖諱惠

考諱添皆有隱德先生娶北關羅氏先卒子男二長即
鈍次銘先卒女四金孟春程文度胡福希汪永真其壻
也孫男一淮孫女四以其年月日葬某處孺人羅氏祔
銘曰

志高兮無事乎翱翔蘊奇兮發見乎詞章孜孜好古道
允臧是為斯文之光

謚齋先生鮑公寧行狀

家乘

先君諱寧字廷謚號謚齋世家歛西棠越居棠越傳九

世諱壽孫當宋末偕父爭死於難因得免事載宋史旌
為慈孝鮑氏我太宗文皇帝表入孝順事實賜詩褒寵
十世諱周元掌教歙庠以子貴封黟縣尹十一世諱同
仁歷官至會昌同知十二世諱深文學為當代所宗授
師山書院山長值元季之變羣小騷攘能以信義服衆
庇及鄉里立社倉以濟貧乏既没人思仰之以鄉先生
附祀于社十三世諱頰洪武初擢翰林修撰同知制誥
兼國史院編修官十四世諱相有隱德士之稱家風者

歸焉配安人汪氏內行刑于九族先君考妣也先君昆
弟三人少失怙遭時多艱惟伯考當室而先君篤於學
以相感勵必思昭先德正浮俗銖錢尺帛不入私房暨
季父立能協志任經營之責先君生以洪武辛未幼穎
悟嗜學甫七歲能賦詩人咸異之然為學未有師授而
心地開明於義理獨有所得首誦小學四書輒能領其
要於是通習經傳旁及子史諸書日開月進年十九受
徒講學凡四載乃挾古今書為司馬子長遊兩經古汴

歷覽齊魯吳蜀楚之勝歸隱以求志明天人之理根事物之源而踐其實郡邑文武大夫士之賢者咸相禮焉正統初御史天台李公郡守南昌崔公相與薦之力辭不就末嘉孫公來為郡以清節自高獨屈已遇先君每見必談經史論古今及政務之要出所寫墨梅題贈勸之仕終不應退益以道自勵自是郡邑舉行鄉飲酒禮必致請先君亦多謝絕不赴景泰甲戌朝廷下命纂修郡志太守福山孫公禮請而從事焉天順庚辰年七十

辨正天原發微其書凡二十五篇於太極河圖二章各著總論其他則隨文見義于其下通數萬言於為文則不事藻飾辭達理明旁通曲暢而義無不周至論順天應人尤能發明孔氏之旨以詔後學於理學之餘至陰陽地理醫藥諸家之說無不究竟著正縫鍼論以明葬術之槩因少感心氣疾而留意於醫探軒岐之奧得衛生之理復推以濟人遠近之疾危而賴之以痊者甚衆或有囁訟於官不能決者質之先君必兩得其情人咸

感服於族黨推尊祖敬宗之義其為譜也不遺微以疎親不附顯以借重澄其源清其流誌其實且立為定式使子孫有所取法於祀先之禮謂家禮所載固為明備猶以西為上嘗酌古制更其式而行于家以為尚右之說由漢明帝始朱子言漢之為禮畧矣又家禮註謂朱子嘗欲定議復昭穆之制而未獲夫先王之制作有非淺學所能窺測顧此不以中正為尊而以西為上者禮未之有聞且以高祖為尊置其位於堂上偏西之角則

無可尊之義而有乖夫事生事存之理嘗欲書其槩以俟夫討論者歲壬午七月擬著筆而疾作竟至大故是月十七日也享年七十有二孺人江村士能君女本槐塘程氏克相先德所撫子曰泰女三長可適黃禮次章適汪亨二素適程俊泰之子二佑佐嗚呼先君無一命之祿而惠澤每加於人朋友交之而過失有規子弟從之而孝弟益勉甘處乎林壑而有道存焉故其歿也遠近之士莫不嗟悼聞者爭相赴哭罔極之恨其何能已

塾賓朱士俊覽其辭填其諱以學者之稱題曰謚齋先生而復贅之曰先生之學成矣先生之行尊矣觀民風者必有採焉

槐瀕先生程公孟碑銘

家乘

昔杞宋以王者之後而孔子猶歎其文獻不足徵況其餘乎程本周之侯國休父則始封者也其後國亡而子孫散處于晉曰嬰者死趙事號忠誠君世望河北至東晉有元譚者守新安以循吏賜居郡中由是江南始有

程姓者凡數傳至梁將軍忠壯公靈洗有禦盜全郡之功食其鄉州廟號世忠程以是益顯至唐定氏族而程遂居十大姓之一肩系之蕃幾有一郡之半又蔓衍于四方由宋至今其居歛之槐塘者曰元鳳起進士相理度兩宗號吉國文清公公六世孫曰槐瀕先生諱孟以諸程自唐以來譜牒山委莫能相通乃遠者走書近者親會盡發我宗人之藏手自披校窮二十餘年為程氏諸譜會通五十卷外譜二卷忠誠太守忠壯三祖遺跡

及褒典經元季之亂蕩無存焉先生又搜輯而類次之
為世忠事實源流錄十卷文清公手澤及理宗御書多
淪于異姓先生不惜重購之以歸為明良慶會錄三卷
於是新安之程凡數百年文獻之傳賴以勿墜而先生
亦不可作矣嗚呼若先生豈非孔氏之所見予者哉先
生字文貴槐瀕其別號也性誠樸而孝友動必以義終
其身為鄉黨師鄉人化之郡邑大夫歲時禮於其廬力
學好古愈老不倦其纂述別有黃山小錄諸書而新安

總志尚未脫藁所自著有槐瀕集其卒成化乙酉四月二十五日享年六十有七墓在本里荷塘山之原配汪氏共守儒素人稱其賢子男三人景岑景山景微孫五人琬琰琰琮瑤亦皆能守先生之遺書而讀之敏政於先生為族子宦居北方不及敬拜牀下而數辱手教惠顧諄複蓋寤寐之不忘也謹撰銘文一通寄其諸孫刻諸墓上之石以昭先生於無窮銘曰

猗乎先生其弗死兮維古程國之肖子兮篤我宗誼而

弗之圯兮闡我先猷而實是紀兮相爾公孫之復其始
兮胡寧在彼而不在此兮爰卜斯藏于槐之里兮羌山
之崔而水之瀾兮荷先生之名兮曷其已兮

韞齋處士程公玩墓銘

張闕


公諱玩字叔潤號韞齋姓程氏休寧人先世居黃墩流
派演迤至唐御史中丞都使公灃始遷汊川族益大公
六世祖曰洙登淳祐進士歷貴池上元二縣簿以節死
子徹任國諭生二子曰茂曰齊粹然儒者曾王父膺

齊之子也王父闡父相三世皆淳謹世其學配楊湖
孫氏制行貞靜孀居三十年如一日公自幼敏銳肆
力于學旁通地理星厯卜筮之術暨長郡邑守令繼請
為師由是名益振縉紳多內交宣德癸丑編統宗譜以
書會建昌族太常卿南雲得其梓本為全譜六十卷閱
九載始成功亦勞矣晚年杜門謝事日究先天之理又
號悟易老人公剛毅不阿事親孝教子嚴處友信善書
法生洪武戊寅三月十三日卒景泰丙子八月十九日

春秋五十有九戊寅正月十一日葬里之湖頭礪坐子
癸面午丁遵治命也配璜源吳梅軒孫女三十一歲卒
子世隆繼歛西鄭氏後公三年卒壽六十五子二世美
世充嗚呼公以勤苦自勵卓然有立於世才德兩優未
至於用而以隱終惜哉雖然諸子駸駸克肖可無憾矣
公歿十有四年無銘其墓者一日三子持狀請銘以詔
後予忝眷好知公德詳不辭乃序而銘曰

岐阜崇崇雲溪溶溶猗歟程公德澤攸同卜藏幽宮流

慶無窮



新安文獻志卷九十五下